



Datë: 27.08.2025  
Numër Protokolli: 5765/2025

A.nr.742/2025

**Këshilli i Pavarur Mbikëqyrës për Shërbimin Civil të Kosovës** – Kolegji për Shqyrtimin dhe Vendosijen e Ankesave, në përbërje nga: Ardita Haxhnikaj Demi-kryetare; Malsore Gashi Bajraktari dhe Eshref Shabani, anëtarë, me Kaltrina Avdullahi-Prenaj, në cilësinë e procesmbajtëses, në procedurë sipas ankesës me numër A.nr.742/2025, të datës 28.04.2025, të parashtruar nga ankuesi A.D kundër organit të punësimit: Komuna e Lipjanit, në çështjen juridike “*Kërkesë nga marrëdhënia e punës*”, duke vepruar në pajtim me nenin 6, paragrafin 1, nën paragrafin 1.1, nenin 6 paragrafi 3 dhe dhe nenin 18, paragrafin 1, nën paragrafin 1.2 dhe 1.4 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, më datë 27.08.2025, mori këtë:

## V E N D I M

**I. Aprovohet si e bazuar** ankesa A.nr.742/2025, e datës 28.04.2025, e parashtruara nga ankuesi A.D, ashtu që, **detyrohet** Udhëheqësi i Burimeve Njerëzore në Komunën e Lipjanit, që brenda afatit prej 15 ditësh nga dita e pranimit të këtij vendimi, të rishqyrtoj kërkesën e datës 19.02.2025 të parashtruar nga ankuesi A.D dhe të nxjerr akt administrativ në pajtueshmëri me dispozitat ligjore në fuqi.

**II.** Këshilli i Pavarur Mbikëqyrës për Shërbimin Civil të Kosovës duhet të njoftohet me shkrim pas ndërmarrjes së veprimeve në pajtim me këtë vendim.

## A r s y e t i m

Nëpunësi civil, A.D, (në tekstin e mëtejme referuar:Ankuesi), më datë 28.04.2025, ka parashtruar ankesë në Këshillin e Pavarur Mbikëqyrës për Shërbimin Civil të Kosovës, kundër përgjigjes me numër protokolli 01-120/04-15879, të datës 08.04.2025, të Njësisë së Burimeve Njerëzore në Komunën e Lipjanit.

Këshilli i Pavarur Mbikëqyrës për Shërbimin Civil të Kosovës (në tekstin e mëtejme referuar: Këshilli) bazuar në dispozitat e Rregullores Nr.02/2018 për Procedurën e Shqyrtimit dhe Vendosijes së Ankesave, ka proceduar kërkesën për përgjigje në ankesë tek Komuna e Lipjanit, ndërsa, kjo e fundit, më datë 21.05.2025, ka përcjellë përgjigjën në ankesë së bashku me provat materiale referuar çështjes në procedurë ankimore.

Kolegji i Këshillit nga administrimi i shkresave të lëndës ka gjetur se ankuesi është i punësuar në Komunën e Lipjanit, dhe se i njëjti ushtron pozitën e Zyrtarit të Kadastrit.

Tutje, sipas shkresave të lëndës rezultojnë se ankuesi më datë 06.03.2025, ka parashtruar kërkesë të Njësia e Burimeve Njerëzore në Komunën e Lipjanit, duke kërkuar nga grupi i vlerësimit për klasifikimin e vendeve të punës, që ti mundësohet emërtimi i pozitës së punës ashtu siç është paraparë në tabelën e Katalogut të Vendeve të Punës si Zyrtar i Lartë për Çështje Juridike Kadastrale, klasa Profesional 1, ndërsa, Njësia e Burimeve Njerëzore në Komunën e Lipjanit përmes përgjigjes me Nr.01-120/04-15879, ka njoftuar ankuesin se nuk kemi pozita të lira dhe të planifikuara me buxhet, andaj Ministria e Financave nuk lejon të rritet numri i zyrtarëve prej atyre që janë aktual.

Ankuesi në ankesë e parashtruar në Këshillin e Pavarur Mbikëqyrës për Shërbimin Civil të Kosovës, pretendon së pozita e tij duhet të klasifikohet ashtu sikurse është përcaktuar më katalogun e vendeve të punës. Kërkon nga Këshilli që të aprovoj ankesën si të bazuar dhe të detyroj organin e punësimit të shfuqizoj përgjigjen e dhënë në kërkesën e tij, duke obliguar Kryetarin e Komunës së Lipjanit që të bëjë rregullimin e pozitës së ankuesit nga klasa profesional 2 në klasën profesional 1.

Kolegji i Këshillit ndërlidhur me rregullat e veprimeve procedurale të një organi publik, ju referua dispozitave të Ligjit Nr.05/L-031 për Procedurën e Përgjithshme Administrative (*tutje referuar: LPPA*), përkatësisht nenit 10 paragrafi 2 ku përcaktohet se: *2. Organi publik zhvillon procedurën administrative sa me të shpejtë dhe me sa më pak shpenzime, për të dhe për palën, duke mos cenuar çfarë është e nevojshme për një rezultat të ligjshëm e të përshtatshëm të procedurës administrative, si dhe nenit 97 paragrafi 1 të këtij ligji, ku përcaktohet se: 1. Një procedurë administrative e nisur sipas kërkesës, përfundon me njoftimin e një akti administrativ apo lidhjen e një kontrate administrative, dhe si rrjedhojë në kuptim të këtyre dispozitave ligjore si dhe bazuar në shqyrtimin e provave materiale të çështjes, Kolegji i Këshillit konstatoi se organi përkatës i punësimit, në rrethanat e rastit konkret, nuk ka vepruar në pajtueshmëri me dispozitatat përkatëse ligjore, në raport me kërkesën e datës 06.03.2025, të parashtruar nga ankuesi, ngase, sipas bazës ligjore si me sipër, vullneti i organit publik në realizimin e autoritetit publik formësohet në procedurë administrative dhe manifestohet në formën e njërit prej veprimeve administrative, siç janë: akti administrativ; kontrata administrative apo akti real, dhe se në vlerësimin e Kolegjit, organi përkatës i punësimit, në kuadër të autorizimeve të përcaktuara me legjislacionin në fuqi, është dashur që të nxjerr akt administrativ në kuptim të vendosjes dhe të njoftoj palën për aktin e tillë, brenda një afati prej 45 ditësh sikurse përcaktohet me nenin 98 paragrafi 2 apo afatit të vazhduar sipas nenit 99 paragrafi 1 të LPPA-së.*

Kështu që, thënë si me sipër e duke u bazuar në nenin 18 paragrafin 1 nën paragrafin 1.4 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, Kolegji i Këshillit vendosi të aprovoj si të bazuar ankesën e datës 28.04.2025, në kuptim të shkeljeve procedurale, dhe si rrjedhojë detyroj Udhëheqësin e Burimeve Njerëzore në Komunën e Lipjanit, që në respektim të dispozitave procedurale të shqyrtoj kërkesën e ankuesit të parashtruar më datë 06.03.2025, dhe të nxjerr akt administrativ në përputhshmëri me dispozitatat ligjore në fuqi.

**Këshillë Juridike:** Vendimi hyn në fuqi në ditën e nënshkrimit nga Kryetarja e Kolegjit. Pala e pakënaqur, e cila pretendon se vendimi i Këshillit nuk është i ligjshëm, mund të iniciojë konflikt administrativ në Gjykatën Themelore në Prishtinë/Departamenti për Çështje Administrative, brenda afatit prej tridhjetë (30) ditësh, nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

## **KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS**

*Lënda me numër A.nr.742/2025*

**Kaltrina Avdullahi-Prenaj**

Procesmbajtëse

**Ardita Haxhnikaj Demi**

Kryetare e Kolegjit

### **Vendimi i dërgohet:**

- *Ankuesit, A.D;*
- *Udhëheqësit të Njesisë së Burimeve Njerëzore në Komunën e Lipjanit; dhe*
- *Arkivit të KPMSHCK-së.*